

## **Tutumie Muda Kumtafakari Mungu**

Acheni, mjue ya kuwa Mimi ni Mungu, Nitakuzwa katika mataifa, nitakuzwa katika nchi—**Zaburi 46:10.**

Wakristo wanapaswa ... kukuza upendo wa tafakari na kuthamini roho ya ibada. Wengi huonekana kuchukia muda uliotumiwa katika kutafakari na kuchunguza Maandiko na maombi, kana kwamba muda uliotumiwa hivyo ulipita bure. Natamani ninyi nyote mngeyaangalia mambo haya katika nuru ambayo Mungu anataka muwe nayo; kwa maana mngeufanya ufalme wa Mbinguni kuwa na umuhimu wa kwanza. Kudumisha moyo wako kwa mambo ya Mbinguni, kutaleta nguvu katika hisani zako zote na kuleta uzima katika majukumu yako yote. Kuiadibisha akili kutafakari mambo ya mbinguni, kutaweka maisha na bidii katika juhudi zetu zote.

Hebu kila mtu anayetamani kuwa mshirika wa asili ya Mungu athamini ukweli kwamba lazima aepuke upotovu ambao uko ulimwenguni kwa njia ya tamaa. Lazima kuwe na mapambano ya daima na ya dhati ya nafsi dhidi ya mawazo mabaya ya akili. Lazima kuwe na upinzani thabiti wa majaribu ya kutenda dhambi katika mawazo au matendo. Nafsi lazima itunzwe dhidi ya uchafu, kwa njia ya kumwamini Yeye ambaye anaweza kukutunza usianguke. Tunapaswa kuyatafakari Maandiko, na kutafakari kwa busara na uwazi juu ya mambo ambayo yanafungamana na wokovu wetu wa milele. Rehema na upendo wa milele wa Yesu, kafara iliyotolewa kwa niaba yetu, vinatuhitaji kuvitafakari kwa dhati na kwa bidii. Tunapaswa kutafakari tabia ya Mkombozi mpendwa na Mtetezi wetu. Tunapaswa kutafuta kuelewa maana ya mpango wa ukombozi. Tunalazimika kuutafakari utume wa Yeye ambaye alikuja ili kuokoa watu Wake kutoka katika dhambi zao. Kwa kudumu kutafakari mada za mbinguni, imani na upendo wetu vitakuwa imara. Maombi yetu yatapokelewa na Mungu zaidi na zaidi, kwa sababu yatachanganyika na imani na upendo zaidi na zaidi. Tutakuwa na akili na bidii zaidi.

Akili inapokuwa imejazwa hivyo ... yule aaminiye katika Kristo ataweza kutoa mambo mema toka kwenye hazina ya moyo.